

–Հապ օ՛ն յառաջ, կգոչէ Ամբակում աղան եւ այնպիսի արագութեամբ մը կ'անցնի բժշկին քովէն, որ Ասկղեպիոսին աշակերտը գետին կ'իյնայ:

Բժիշկը վար կ'երթայ եւ Ամբակում աղային տիկնոջ կ'ըսէ.

–Ամուսնոյդ ուղեղը վնասուած է:

–Խելագարա՞ծ է:

–Գրեթէ:

–Ի՞նչ կ'ըսէք, հիմա խելքս կ'ընդունեմ... ասոր մէկ ճա՞րը:

–Ճա՞րը... կապելու եւ Փրկիչ տանելու է:

–Ըլլալու բան չէ... գոնէ ազգային երեսփոխանական ժողովը տանինք...:

–Երեսփոխանական ժողովը յիմարանո՞ց է:

–Ի՞նչ գիտնամ, երեկ քրոջս տղան կ'ըսէր, որ ազգային երեսփոխանական ժողովոյ մէջ խենդ ու խելատ խօսքեր կ'ընեն: Բայց, տէր բժիշկ, իմ ամուսինս խելագարելու պատճառ մը չունէր:

–Բանի մը վրայ շատ մտածե՞ց:

–Բնաւ երբէք:

–Մեծ վիշտ մը կրե՞ց:

–Ոչ:

–Խմբագրութիւն կ'ընէ՞:

–Ամենեւին:

–Ֆրանսերէնէ - հայերէն ընդարձակ բառարան մը կը հրատարակե՞:

–Ոչ, ոչ, աղանկ բաներ չըներ:

–Չափազանց ուրախութիւն մը զգա՞ց մօտերս:

–Գրեթէ քանի մը ատենէ ի վեր միշտ ուրախ եր, ամեն օր կ'ըսէր. «Հայաստանի կուսակալ պիտի ըլլամ»:

–Խե՛ղճ մարդ:

–Խղճալի՛ ամուսինս:

Բժիշկը դեղագիր մը կգրէ, այցելութեան վարձը կ'ընդունի եւ կը մեկնի:

Ամբակում աղան վար կու գայ եւ կհրամայէ, որ սեղան պատ-րաստուի: